



Broj/Број: 01/7-50-1-53-3-12/04
Sarajevo/Сарајево: 22.03.2004.

Prim. broj:	31.03.2004
Org. jed.	
	Vrijednost

ZAPISNIK

Sa dvanaeste sjednice Administrativne komisije Zastupničkog doma Parlamentarne skupštine Bosne i Hercegovine, održane u prostorijama institucija Bosne i Hercegovine dana 22.03.2004 godine sa početkom u 18 sati i 20 minuta. Sjednica je trajala do 18 sati i 30 minuta.

SJEDNICI SU PRISUSTVOVALI ČLANOVI KOMISIJE: Jusufović Munib, Kragulj Nikola, Zorić Vinko, Križanović Jozo, Blagojević Mirko, Novaković Momčilo;

SJEDNICI NISU PRISUSTVOVALI: Džaferović Šefik, Ivo Miro Jović;

OSTALI PRISUTNI: Vedran Hadžović, tajnik Zjedničke službe Tajništva Parlamentarne skupštine Bosne i Hercegovine;

Dvanaestom sjednicom Administrativne komisije Zastupničkog doma Parlamentarne skupštine Bosne i Hercegovine, **je predsjedavao Munib Jusufović.**

Za sjednicu je predložen slijedeći :

DNEVNI RED:

1. -Usvajanje Zapisnika sa 11-e sjednice Administrativne komisije;
2. Razmatranje «Rezolucije o povlačenju iz procedure i uvođenju privremenog petogodišnjeg moratorijuma na sve zakone i odluke kojima se uvode nove privilegije izabranih dužnosnika u izvršnoj i zakonodavnoj vlasti» dr Zlatka Lagumdžije;
3. Razmatranje Zahtjeva, poslanika Morankić Muhameda, predsjedavajućeg mješovitog Kluba zastupnika, za iznalaženje prostora za rad Kluba;
4. Izmirenje obaveza iz 2001 godine prema hotelu «Holiday Inn» ;
5. Donošenje Odluke o izmjenama Pravilnika o plaćama i naknadama državnih službenika i namještenika u Tajništvu Parlamentarne skupštine Bosne i Hercegovine, broj: 01,02/7-289/00 od 23. studenog 2000 godine;
 - (a)-Donošenje zaključka o pripremi Prečišćenog teksta Pravilnika;
 - (b)- Donošenje zaključaka o pripremi Prečišćenog teksta Odluke o načinu obračuna plaća i ostalih materijalnih prava zastupnika i izaslanika u Parlamentarnoj skupštini Bosne i Hercegovine od 11. travnja 2000.;
6. Imenovanje članova u Ad hoc povjerenstvo za izbor i imenovanje sukladno članku 2 Zakona o izmjenama i dopunama Izbornog zakona Bosne i Hercegovine (Sl. glasnik BiH broj 4/04);
7. Dogovor oko daljih aktivnosti o izboru člana Izborne komisije Bosne i Hercegovine u skladu sa člankom 2.5 stavak 5 Izbornog zakona Bosne i Hercegovine (Sl. glasnik BiH broj: 23/01, 7/02, 9/02, 20/02, 25/02-ispravka i 4/04);
8. TEKUĆA PITANJA:
 - (a)- Zahtjev Vinka Zorića za naknadu troškova nastalih zbog izgubljenog prtljaga prilikom službenog putovanja u Pariz;
 - (b)- Razmatranje pismene reakcije Foruma parlamentaraca na Zakon o statusu poslanika;

Prisutni članovi Administrativne komisije Predstavničkog doma Parlamentarne skupštine Bosne i Hercegovine **su jednoglasno usvojili predloženi dnevni red.** Pošto je usvojen dnevni red, pristupilo se razmatranju istog, po pojedinačnim tačkama.

AD-1 Zapisnik sa 11-e sjednice Administrativne komisije **usvojen je jednoglasno bez primjedbi.**

AD-2 Ova točka dnevnog reda **jednoglasno je odložena za narednu sjednicu** Administrativne komisije.

AD-3 Ova točka dnevnog reda **jednoglasno je odložena za narednu sjednicu** Administrativne komisije.

AD-4 Po ovoj točki dnevnog reda obrazloženje je dao Vedran Hadžović, tajnik Zajedničke službe. Po obrazloženju priloženog materijala za ovu točku dnevnog reda, Momčilo Novaković je upozorio prisutne na Odluku Administrativne komisije po kojoj je najviši odobreni iznos za noćenje 100 KM. Na osnovu pozivanja na navedenu Odluku, **Administrativna komisija je jednoglasno donijela:**

ZAKLJUČAK

I-Ova točka dnevnog reda nije spremna za raspravljanje, pa se ista skida sa dnevnog reda dvanaeste sjednice Administrativne komisije.

II- Zadužuje se **izvjestilac** po ovoj točki dnevnog reda, da **pripremi materijal**, sukladno citiranoj Odluci Administrativne komisije o limitiranju najvišeg iznosa za troškove noćenja, **za narednu sjednicu Administrativne komisije.**

AD-5 Obrazloženje za ovu točku dnevnog reda dao je Vedran Hadžović, tajnik Zajedničke službe. Po datom obrazloženju ove točke dnevnog reda, **predsjedatelj** Administrativne komisije Jusufović Munib **je upozorio** na prethodna iskustva vezana za trošenje budžetskih sredstava i **izrazio mišljenje** da bi ovu točku dnevnog reda Stručna služba trebala **dodatno obrazložiti**. Na osnovu navedenog prijedloga, Administrativna komisija **je jednoglasno donijela:**

ZAKLJUČAK:

Ova točka dnevnog reda **odlaže se za narednu sjednicu Administrativne komisije.**

AD-5 (a) Po ovoj točki dnevnog reda obrazloženje je dala Davorka Čaplinski, tajnik Administrativne komisije Zastupničkog doma Parlamentarne skupštine Bosne i Hercegovine. Upoznala je prisutne, **da je radi velikog broja izmjena i dopuna**, Pravilnika o plaćama i naknadama državnih službenika i namještenika u Tajništvu Parlamentarne skupštine Bosne i Hercegovine broj:01,02/7-289/00 od 23. studenog 2000 godine, **potrebno napraviti Prečišćeni tekst citiranog akta.** Imenovana je upoznala prisutne **sa procedurom pristupanja izradi** Prečišćenog teksta i **potrebi da** Administrativna komisija **ovlasti tajnika da može pripremiti** Prečišćeni tekst zajedno sa tajnikom Komisije za financijske i administrativne poslove Doma naroda Parlamentarne skupštine Bosne i Hercegovine. Pošto je razjašnjeno da se radi samo o **pripremi** Prečišćenog teksta koji će se razmatrati na Administrativnoj komisiji, **jednoglasno je usvojen:**

ZAKLJUČAK:

Ovlašćuje se tajnik Administrativne komisije Zastupničkog doma Parlamentarne skupštine Bosne i Hercegovine, da u suradnji sa tajnikom Komisije za financijske i administrativne poslove Doma naroda Parlamentarne skupštine Bosne i Hercegovine **pripremi** Prečišćeni tekst Pravilnika o plaćama i naknadama državnih službenika i namještenika u Tajništvu Parlamentarne skupštine Bosne i Hercegovine, broj: 01,02/07-289/00 od 23. studenog 2000 godine.

AD-5 (b)- Po ovoj točki dnevnog reda obrazloženje je dala Davorka Čaplinski. Imenovana je upoznala prisutne, **sa stavom**, koji su zauzele na prvoj zajedničkoj sjednici održanoj 10.03.2003 godine, Administrativna komisija i Komisija za financijske i administrativne poslove, **da se radi velikog broja izmjena i dopuna** Odluke o načinu obračuna plaća i ostalih materijalnih prava zastupnika i izaslanika u Parlamentarnoj skupštini Bosne i Hercegovine od 11.travnja 2000, **treba sačiniti Prečišćeni tekst citiranog akta.** Na osnovu naprijed navedenog Administrativna komisija **je jednoglasno donijela:**

ZAKLJUČAK:

I-Ovlašćuje se tajnik Administrativne komisije Zastupničkog doma Parlamentarne skupštine Bosne i Hercegovine, da u suradnji sa tajnikom Komisije za financijske i administrativne poslove Doma

naroda Parlamentarne skupštine Bosne i Hercegovine pripremi Prečišćeni tekst Odluke o načinu obračuna plaća i ostalih materijalnih prava zastupnika i izaslanika u Parlamentarnoj skupštini Bosne i Hercegovine od 11. travnja 2000 godine.

II-Imajući u vidu, da je u Odluci o izmjenama i dopunama Odluke o načinu obračuna plaća i ostalih materijalnih prava zastupnika i izaslanika u Parlamentarnoj skupštini Bosne i Hercegovine, broj:01,02/7-126/00 od 4. svibnja 2000, koja je donesena 09.04.2003 godine pod brojem:01/07,02/3-011-509/03 napravljena tehnička greška, utvrdivši člankom 2, da se stavak 2 i 3 briše, umjesto stavka 3 i 4, Odluke o načinu obračuna plaća i ostalih materijalnih prava zastupnika i izaslanika u Parlamentarnoj skupštini Bosne i Hercegovine od 11. travnja 2000 godine, potrebno je ovu tehničku grešku otkloniti, prilikom konačne izrade Prečišćenog teksta.

AD-6 Po ovoj točki dnevnog reda obrazloženje je dao tajnik Administrativne komisije sukladno Dopisu Izbornog povjerenstva Bosne i Hercegovine broj:01/7-50-3-303/04 i članku 2 Zakona o izmjenama i dopunama Izbornog zakona Bosne i Hercegovine ("Sl. glasnik BiH" broj:4/04). Pošto Administrativna komisija u skladu sa člankom 2 citiranog Zakona imenuje tri člana iz reda svojih članova u Ad hoc povjerenstvo za izbor i imenovanje, pristupilo se predlaganju članova za Ad hoc povjerenstvo. Za članove u Ad hoc povjerenstvo predloženi su: Novaković Momčilo, Zorić Vinko i Felić Hazim. Pošto nije bilo drugih prijedloga, Administrativna komisija je stavila prijedlog na glasanje i sukladno članku 2 citiranog Zakona, jednoglasno donijela:

ODLUKU

I-U Ad hoc povjerenstvo za izbor i imenovanje, iz reda članova Administrativne komisije Zastupničkog doma Parlamentarne skupštine Bosne i Hercegovine, imenuju se:

- 1.Novaković Momčilo
- 2.Zorić Vinko
- 3.Felić Hazim

Ad-7 Po ovoj točki dnevnog reda obrazloženje je dao tajnik Administrativne komisije sukladno Dopisu Izbornog povjerenstva Bosne i Hercegovine broj:01/7-50-3-304/04 od 18.03.2004 godine. Imenovana je upoznala prisutne da je zbog velikog broja izmjena i dopuna Izbornog zakona Bosne i Hercegovine ("Sl. glasnik BiH" broj:23/01, 7/02, 9/02, 20/02, 25/02-ispravka i 4/04) otežana njegova primjena, pa se s toga javljaju nesporazumi, kao u slučaju mišljenja Izbornog povjerenstva Bosne i Hercegovine izloženog u citiranom dopisu. Imenovana je naglasila, da je upravo iz razloga razjašnjenja Dopisa Izbornog povjerenstva i tumačenja citiranog Zakona, napravila za potrebe Administrativne komisije nezvaničan prečišćeni tekst članka 2.5 i 19.1 koji je dostavljen u prilogu materijala za ovu točku dnevnog reda. Sukladno Dopisu Izbornog povjerenstva broj:01/7-50-3-304/04 od 18.03.2004 godine, imenovana je navela, da se ovdje radi o izboru člana Izbornog povjerenstva Bosne i Hercegovine iz reda srpskog naroda, na mjesto gospodina Branka Perića koji odlazi na drugu dužnost, a što je regulirano člankom 2. 15 citiranog Zakona. Upoznala je prisutne članove Administrativne komisije sa ovom zakonskom odredbom, a koja između ostalog u navedenim slučajevima predviđa, da se novi član Izbornog povjerenstva imenuje na način i po postupku kako je imenovan prethodni član, te da mandat novog člana traje do isteka mandata prethodnog člana. Naglasila je, da je nejasan Dopis Izbornog povjerenstva kad se radi o primjeni članka 2.5 citiranog Zakona i članka 2 Zakona o izmjenama i dopunama Izbornog zakona Bosne i Hercegovine ("Sl. glasnik BiH" broj:4/04) vezano za članak 2.15 citiranog Zakona. Iz napred navedenih razloga i nejasnoća koje proizilaze iz Dopisa Izbornog povjerenstva u tumačenju citiranih članaka Izbornog zakona Bosne i Hercegovine ("Sl. glasnik BiH" broj:23/01, 7/02, 9/02, 20/02, 25/02-ispravka i 4/04), Jusufović Munib je predložio, da se u svezi sa ovom točkom dnevnog reda stupi u kontakt sa Izbornim povjerenstvom i da se razjasne tumačenja vezana za izbor novog člana Izbornog povjerenstva i ulogu Ad hoc povjerenstva za izbor i imenovanje. Naglasio je da je najprihvatljivija varijanta, da taj postupak sukladno Zakonu završi Ad hoc povjerenstvo za izbor i imenovanje.

AD-8 (a) Po ovoj točki dnevnog reda Jusufović Munib je, shodno zaključku sa 11-e sjednice Administrativne komisije, postavio pitanje, da li je dato pravno mišljenje vezano za ovaj slučaj i da li po pravnom mišljenju Stručne službe postoji pravni osnov za rješavanje zahtjeva Vinka Zorića?

Davorka Čaplinski je informisala predsjedatelja da je Pravno mišljenje, sukladno zaključku sa 11-e sjednice Administrativne komisije, izrađeno i dostavljeno uz poziv za ovu sjednicu. Po njenom mišljenju postoji pravni osnov, budući da je šteta nastala na službenom putu bez krivnje podnosioca zahtjeva, a neprofesionalnim pružanjem zaštite zastupniku od strane Veleposlanstva BiH u Parizu. Iz navedenog proizilazi da treba udovoljiti zahtjevu u skladu sa postignutom, a nerealizovanom nagodbom. Istakla je, da bi pravično rješenje bilo, rješenje postignuto posredovanjem Veleposlanstva BiH u Parizu tj. da se imenovanom naknadi 50% iznosa računa za odijelo i 100% ostalo, što treba iz priloženih računa definirati, cijeneći nužne i neophodne troškove, za realizaciju svrhe službenog puta i kupljene robe koja ulazi u troškove pod ostalo. Imenovana je u skladu sa člankom 33 Poslovnika Zastupničkog doma Parlamentarne skupštine Bosne i Hercegovine ("Sl. glasnik BiH" broj: 20/00) predložila Administrativnoj komisiji da formira podkomisiju koja će zajedno sa Stručnom službom i Vinkom Zorićem utvrditi koji se račun odnosi na odijelo, kako bi se umanjio za 50%, te utvrditi tačan iznos ostalog, sa priloženih računa. Naglasila je da sve ovo treba cijeliti u skladu sa svrhom puta i diplomatskim protokolom. Obzirom da se radi o zastupniku Zastupničkog doma Parlamentarne skupštine Bosne i Hercegovine, te činjenici da u međunarodnim odnosima i predstavljanju organa i institucija vladaju protokolarna pravila koja određuju i oblačenje osobe, a koja najbolje poznaje, osoba koja je vršila dužnost šefa države (kolektivnog organa), imenovana je sugerisala da se obavezno za jednog od članova podkomisije Administrativne komisije izabere Jozo Križanović. **Ova sugestija o izboru Joze Križanovića u podkomisiju Administrativne komisije je prihvaćena.** Na izlaganje Davorka Čaplinski i upozorenje da podnosilac zahtjeva odgovara za istinitost i točnost priloženih računa, kad se radi o kupljenoj robi koja nosi svoj međunarodno poznat identifikacijski broj, reagovao je Vinko Zorić. Naglasio je da Davorka Čaplinski nema pravo govoriti na sjednici dok nedobije riječ, te istakao, da mu tajnik prijeti upozorenjem da podnosilac zahtjeva odgovara za istinitost i točnost podataka. Naglasio je, da je od zahtjeva mislio odustati, ali da sad ostaje kod svog zahtjeva pošto je dokazao da mu to pravo pripada. Po izlaganju Vinka Zorića, Davorka Čaplinski se izvinila za nastali nesporazum, obzirom da je, upozorenje podnosiocu zahtjeva, da odgovara za točnost i istinitost podataka, zakonska obaveza svakog organa Bosne i Hercegovine koji rješava predmet iz svog djelokruga rada, pa je imenovana u ovom slučaju samo ispunjavala svoju zakonsku obavezu. Pošto je riješen ovaj nesporazum, nastavilo se s predlaganjem članova podkomisije Administrativne komisije, pa su u podkomisiju predloženi pored Joze Križanovića, Momčilo Novaković i Jusufović Munib. Ovaj prijedlog za članove podkomisije Administrativne komisije stavljen je na glasanje. Administrativna komisija je jednoglasno donijela:

ODLUKU

I-Osniva se Podkomisija Administrativne komisije za utvrđivanje tačnog iznosa potraživanja Vinka Zorića po priloženim računima.

II- U Podkomisiju se imenuju:

- Jozo Križanović
- Munib Jusufović
- Momčilo Novaković

III Zadatak Podkomisije je, da sa Stručnom službom u prisustvu Vinka Zorića, utvrdi tačan iznos koji Vinko Zorić potražuje vezano za nerealizovanu nagodbu posrednika Veleposlanstva BiH u Parizu sa prevoznikom Lufthansa.

IV-Podkomisija je dužna, zajedno sa Stručnom službom iz točke III ove Odluke za narednu sjednicu Administrativne komisije pripremiti tačan iznos računa umanjen za 50% i računa koji pokrivaju ostale nepredviđene i nužne troškove za uspješno obavljanje službenog puta u inozemstvu, utvrđene u skladu sa običajima i pravilima protokola.

Po ovoj točki dnevnog reda, Davorka Čaplinski je upozorila prisutne članove Administrativne komisije, na činjenicu da zastupnik Zastupničkog doma Parlamentarne skupštine Bosne i Hercegovine nije dobio adekvatnu zaštitu Veleposlanstva Bosne i Hercegovine u Parizu, te da bi u skladu sa ovom činjenicom trebalo uputiti pitanje Ministarstvu vanjskih poslova Bosne i

Hercegovine. Jozo Križanović je podržao ovaj prijedlog naglašavajući, da to, što je ukratko iznijela Davorka Čaplinski, ima smisla. Rasprava je zaustavljena na ovom pitanju.

AD-8 (b) Ova točka dnevnog reda **jednoglasno je odložena za narednu sjednicu Administrativne komisije.**

AD-8 (c) Na samom kraju 12-e sjednice Administrativne komisije, Vedran Hadžović, je informisao prisutne o postojanju zahtjeva vozača Čizmović Hajrudina za nabavku mobitela. Predložio je, da Administrativna komisija u skladu sa postojećom Odlukom o nabavci mobitela odobri ovaj zahtjev. Predsjedavajući Administrativne komisije je stavio zahtjev na glasanje. Administrativna komisija je jednoglasno donijela:

ODLUKU

I-Odobrava se nabavka mobitela, za vozača u Tajništvu Parlamentarne skupštine Bosne i Hercegovine Hajrudina Čizmovića.

II-Za realizaciju ove Odluke zadužuje se Služba računovodstva Tajništva Parlamentarne skupštine Bosne i Hercegovine.

SEKRETAR
Administrativne komisije
Davorka Čaplinski

PREDSJEDAVAJUĆI
Administrativne komisije
Jusufović Munib